

d'acordo, per tutti i savij di colegio, una lettera a li provedadori zenerali im Padoa, chome hessendo manchato lo illustrissimo Lucio Malvezo, governador zeneral nostro, non hessendo di lassar quel exercito senza governo, *ex nunc* habiamo col senato nostro electo vice governador el magnifico conte Bernardin Forte Brazo, condutier nostro fidelissimo, perhò essi rectori e provedadori ge lo debino dir *etc.* Ave 6 balote di no, e tuto il resto di si, e fu presa.

Item fo scritto, che 'l corpo dil governador sia posto in uno deposito li a San Beneto, senza far altre exequie *etc.* E nota, che dito domino Lucio morite con pessima fama.

Et altro non fu fato im pregadi, *solum*, licentato, restò consejo di X con la zonta fino una hora di note, et *dicunt*, fono su trovar pro al monte novissimo per la decima et $\frac{1}{2}$ tansa, si vol meter, la qual si mete per pagar el monte novissimo di la paga di septembrio presente, et non spazò.

Di Padoa fono letere, di questa matina. Come alcuni homeni d'arme erano venuti dal loro provedador a dolersi, li avanza 8 page col governador, pregando siano pagati, et loro li hano dito, scriveriano a la Signoria. *Item*, hanno fato l'inventario di tute sue robe e arzenti e danari; non li hanno trovati oltra ducati 170 contadi. Non à fioli, *solum* uno nepote, ni moglie *etc.*; arzenti per ducati 1000, XV boni cavali.

A dì 5, la matina, fo letere di Padoa. De occurrentiis etc. *Item*, avisa dil conte Bernardin, chome ringratia la Signoria di la election facta di governador, et farà con optima fede, con molte dolce parole. Et nota. Li provedadori scriveno, tutte le zente de li hanno auto optimo contento di tal electione, et *maxime* Zuam Paulo Manfron, e voleno dimostrar quello val la faction bracescha *etc.* *Item*, mandano certe letere intercepte, come dirò di soto, di uno secretario dil ducha di Ferrara, è in campo con monsignor di la Peliza, di 2, scrive al ducha, nome Marco Antonio. Come l'imperador non verà, henchè si aspeta, e francesi torano l'impresa di Trevixo, e di la rota di Marostega fo pocha; persi cavali 170, li fanti tuti scapolati *etc.*, con altre particularità. *Item*, essi provedadori scriveno, domino Jannes fo el primo dete ubidentia al conte Bernardin; e tutto l'exercito à 'uto consolatione di questo.

237* *Di Trevixo, di sier Lunardo Zustignan, di 4, horre 2 di note.* Come ozi è venuto il trombete dil signor Vitelo, era andato in campo nemicho, et

à menato con si' uno trombete di campo, et il provedador e il signor capetanio, el signor Vitello et Ursino è stati a parlarli mezo miglio fora di la porta, et *etiam* lui vi fu, dal qual non si à potuto cavar altro cha esser venuto acciò la guerra si faza da boni soldadi; che s' il se pia sacomani, fameglj e fanti, per la paga sua i se lassino andar, perchè anche loro farano quel medemo, e cussi sono rimasi di far. E dito trombete alozerà, per sta note, in una caxa, mezo mia luntan di qui, insieme con el trombete del Vitelo, e damatina se ne anderà con uno dil signor capetanio per portar la taia de do soi capi di squara, è qui presoni, *etc.* El nostro trombete dize, per quello l'ha inteso, sono per levarsi, e che in campo si manzava pan negro come el carbon, e che haveano mandato a far pan a Castel Franco, e si non fosse Colalto i stariano mal; et che hanno abuto gran dano de la rota soto Marostega, auta per li nostri di Padoa.

Da poi disnar fo pregadi per meter angarie *etc.* E nota. Gionse sier Antonio Zustignan, el dottor, *licet* senza licentia expressa, ma *solum* si reducesse in loco securo.

Et leto le letere, introe consejo di X con la zonta per trovar fondi al pro dil monte novissimo per la $\frac{1}{2}$ tansa et la decima, ozi, d'acordo, si à meter et lo trovono.

Fo poi leto la parte di debitori, che non poteseno venir im pregadi, *licet* molti di publicati non erano venuti, e in execution questi fono cazati zoso: sier Luca Zen, procurator, sier Michiel Memo, è di pregadi, sier Anzolo Malipiero, è di pregadi, sier Alviex d'Armer, è di la zonta, et alcuni altri, sier Marco Orio *etc.*

Fu posto, per il serenissimo e tutti di colegio, $\frac{1}{2}$ tansa a monte novissimo et una decima al dito monte, a pagar *ut in parte*. Fu presa. La copia di la parte sarà posta qui avanti.

Fu posto, per li savij, che le decime numero 11 et 12, sono a li governadori dil monte novissimo, et numero 8 et 9, $\frac{1}{2}$ tanse, pagino per certo termine, poi siano taiade a 60 per 100 a le cazude. Presa.

Fu posto, che sia tolto in tenuta, a le cazude, beni de li debitori per ducati 20 milia, e poi dati in colegio, per far di essi beni quello sarà deliberato; et li signori e scrivani se redugano a $\frac{1}{2}$ terza et terza soto pena *etc.*, e non occultino alcun debitor soto pena di privation di l'oficio, et non fazino boletin ad alcun di aver pagato *etc.* Presa, *ut in ea*.

Fu posto, per li savij, che sier Antonio Zustignan, el dottor, atento il suo star senza alcun fru-